



DCS-Chlais

2023

Intro I

Sit Tage bin I uf em Wäg da anne
zu dene Stanser Flüüger-Manne.
Ich weiss nid ob Euch das allne so passt,
aber ich rede so wie mer de Schnabel wachst.
Ich entschuldige mich nid – und es isch nid fatal –
dä Chlais schnorret halt überhaupt nid gender-neutral!

En Esel hani das Johr mol keine derbii:
Wägem Fachkräfte-Mangel isch keis Viech ume gsi.
Die einzige Esle wo wärid parat
git's im Bundesamt für Zivil-Luftfahrt.
Die möchtet – dass jede wo ume flüügt -
en Transponder im Arsch het, will dä nid lügt.
Aber vor mine Schimpf und Eure Schand
gib ich jetzt Eune Welpo zerscht d'Hand.

Intro II

So Ihr Flüüger jetzt losed mer mal guet zue,
jetzt isch's verbii mit de beschauliche Rue.
Jetzt vernämid Ihr wem ich guets Lob chan gäh
und wer de Schmutzli am Grind mues näh.
Im letschte Summer da händ ihr gar viel törfe soore
aber jetzt nimmt Euch de Schmutzli vilicht a de Ohre.
Foifti sind ihr worde im CCC.
Ich frag' mich: Gängti da nid no echli meh?
Füfzg Johr Ihr bald uf Euem Buckel händ:
Jä... Gäbs denn da es Flüügerfäscht emänd?
De Clubbus händ Ihr i'd Wüeschi g'schickt
obwohl ihn de Werni doch sooo gern flickt!
Drum händ d'Chüe am Haldi – und au d'Geisse –
ihri Gasmasko jetzt chönne in Chübel schmeisse.



Werni Vogel

Nach Diesel hesch g'schtunke us allne Löcher
und bisch ölverschmiert gsi, das noch und nöcher.
Doch sit Euचे klimaneutrale Ambitione
muesch dini Freiziit nümme go schone.
Was chönnt'sch denn jetzt mache, Du brave Maa,
ohni de Gabi dauernd uf e Wecker z'gah?
Genau! Du hesch tolli Uusflüg organisiert
und s'Verhalte vo me neue Flüüger schtudiert.
Und was'd im Vorschtand leischtisch isch allerhand
dä Chlais sait „viele Dank“ und schüttlet Dir d'Hand!

Ruedi & Fränzi Bircher

Wenn's eim bim flüüge abe schpediert –
total hungrig und völlig dehydriert –
Dänn muess mer würrklich nid verzage
sondern cha de Gang zu Bircher's wage.
Mer mues überhaupt ned verzwiiflen schier:
Gäg Dehydration git's es bächliküeltes Bier.
Und d'Franziska isch en Rieseschatz:
Si stellt au no Fuetter uf de Platz!
Das isch Bircher's Gaschtfründschaft uf höchstem Niveau,
vo Härze freut sich dä Chlais und bedankt sich do!

Daniel Oberhänsli

Er isch en guete Kamerad
so wie's do i mim Buech inn shtaht.
Er chunnt jetzt denn – potz Sappermänt -
sogar i Eues Mänätschmänt!
Nur... S'Club-Bowling hesch Du notiert und denn vergässe:
Bisch lieber in en Schpunte go Metzgete frässe!



Fips Joller

I de Luft han en scho lang nüm g'seh,
ich glaub er hät gar kein Flüüger meh!
Aber isch er z'Sydney git er kei Rue,
sondern gaht bi de Moyes go wichtig tue!
Er chunnt nie dahe mit Frau und Chind
defür het er hüt abig en schwarze Grind.
Au wenn er kein Flüüger me tuet ufschtelle
chan mer immer wider uf ihn zelle!
Drum, Schmutzli, settsch im Fips mol begägne
chasch en denn mit eme Seckli sägne!

Fredy Bircher

Scho wider isch es Johr verbii
und d'Birdlike isch nid untätig g'sii.
Hesch Tourischte vom Horn obenabe schpediert
und neuu Mitglieder für de Club produziert.
Mit „produziere“ meini das wo d'Flugschuel macht –
nid das wo d'Judith mängisch erläbt i de Nacht!
Dank Dir – dä Chlais lobt das ungemain –
schtirbt er nid us, dä Räntnerverein.

Märk Limacher

De Chopf ufe em Hals hesch zwar immer debii,
aber wie Dini Gitarre schiint's en Hohlruum z'sii!
Tön chömed zwar use – mängisch sehr besässe,
aber Sitzige und Windseck tuesch Du vergässe.
Doch will Du so toll tuesch organisiere
tued Di de Schmutzli nöd duerschmiere.
Söllsch es Seckli übercho. Wenn ich nid tue irre
sind ranzigi Nüss guet für e hohli Bire!



Guido Mathys

Tued mer da am Wasser nid an Ranze früüre
dänn lit das a Dir wo so iifrig tued füüre.
Jede chas g'schpüre: Es isch nid warm,
s'isch en Affehitz dass Gott erbarm.
Im Schmutzli sis Arschwasser tued bereits scho choche,
und i mim Bart händ vori es paar alti Flädli g'roche.
Du bisch – das weiss do jedes Schwein –
de heissischt Maa i dem Verein!

Sepp Niederberger

Du hesch – das sägi ohni Gruus –
e ganzi Mängi Holz vor em Huus.
Wer aber Dini Oberwiiti jetzt tued schtudiere,
dä mues ich sofort vehemänt korrigiere:
Das Holz wo wärmt Eus mit em Fүүr,
häsch Du schpändiert – ich danke Dir!

Ruedi Bircher II

Du bisch en schtille Maa und kei Tröte.
Machschi Musig mit ere Runzelflöte.
A de SHV-Schportfiir het mer chönne verneh
dass Du wider einisch hesch alles gäh:
Im Cross Country Cup bisch das Johr Dritte g'sii:
Ich gratuliere – Du bisch wie immer ganz vore derbi!
Will Du unschlagbar bisch am Karbon-Bügel
heissisch jetzt offiziell „Ruedi-The-Eagle“!

Extro

So Ihr wackere Flüügerhorde
ich brich jetzt uf – mues z'rugg in Norde.
Ich gseh do jedes Johr e chli weniger Chind:
Öb Ihr ächt nur am flüüge interässiert sind?
Wenn nei denn hätted Ihr jetzt en Idee:
I de nächschte Mönnet gits nur Schturm und Schnee!
Suscht mutiert dä Club über chorz oder länger
zo es paar müede Altersheim-Penner!



Dä Chlaus seid tschau zäme und macht sich defah –
er wär eigentlich lieber no chli bi Euch blibe schtah –
für en heissi Wurscht mit Brot und es chliises Bier
denn das gits im Himmel nid, da isch es schtier.

Dert äne scharrets scho lang mit de Hufe:
Statt zuelose möchtet's lieber chli suffice.
Händ e friedlich Ziiit bi Chälti und Schnee -
ich hoff, das ich Euch all ime Johr wieder g'seh!
De Chlaus seit tschou zäme, muess sin Heiwäg ufsueche
und hofft, er findt underwägs no echli Kafi und Chueche.
Ich wünsche Euch vo de knackige Thermik gar viel
und immer meh als nume gnueg Luft under em Kiel!